

Ársskýrsla vísindanefndar 2003

Umfangsmikill hluti starfsemi vísindanefndar sneri að Rannsóknasjóði Háskólans. Að þessu sinni hafði umsóknarfrestur í sjóðinn verið færður til 1. október og gaf það góða raun. Við úthlutunarvinnuna var unnið samkvæmt sama ferli og áður þar sem faglegt mat var skilið frá úthlutunarvinnu.

Við faglega matið störfuðu þrjú fagráð, fagráð heilbrigðisvísinda, fagráð hug- og félagsvísinda og fagráð verk- og raunvísinda. Í hverju fagráði voru um fimm fulltrúar, þar af einn til tveir fulltrúar úr vísindanefnd. Fagráð meta allar umsóknir á fagsviði sínu. Samræming og lokafrágangur úthlutunar var síðan í höndum vísindanefndar.

Við úthlutun var unnið samkvæmt svipuðum viðmiðum og áður og leitast við að styrkja sérstaklega góð verkefni. Mjög mikil samkeppni var þó um fjármuni sjóðsins og var stjórninni erfitt verk á höndum. Umsóknir fyrir 2004 voru 220 talsins og hafði þeim fjölgað um 27 frá árinu áður.

Á árinu 2003 veitti rektor Rannsóknasjóði sérstaka viðbótarfjárveitingu af þróunarfé sínu að fjárhæð 10 mkr. til stuðnings rannsóknánámi við Háskólann. Þar af runnu sjö mkr. til rannsóknaverkefna samkvæmt umsóknum til sjóðsins, þar sem styrkurinn er ætlaður til launa doktorsnema. Gert er ráð fyrir að þremur mkr. verði varið til að styrkja nýdoktora sem starfa við Háskólann, en þeir styrkir verða veittir seinna á árinu 2004. Meðalstyrkur við úthlutun úr Rannsóknasjóði HÍ árið 2003 var 652.000 kr. Vísindanefnd sá einnig um úthlutun verkefnabundinna tækjakaupa eins og áður.

Málefni rannsóknastöðustyrkþega (nýdoktora) voru til umfjöllunar hjá vísindanefnd á árinu 2003. Nefndin afgreiddi tillögur um styrkjakerfi þeim til handa sem kemur til framkvæmda á árinu 2004 (sjá ofan).

Vísindanefnd tilnefndi þrjú vísindamenn til verðlauna vegna árangurs í rannsóknum. Nefnd undir forsæti rektors valdi síðan Helga Björnsson, vísindamann á Raunvísindastofnun, og voru honum veitt verðlaunin við brautskráningu Háskólans 25. október. Þá voru áherslusvið í vísindum einnig til umfjöllunar hjá nefndinni.

Önnur mál sem voru afgreidd frá nefndinni á árinu:

Mótun reglna um ritrýnda útgáfu hjá Háskólaútgáfunni. Auglýst var eftir handritum til útgáfu á árinu.

Umfjöllun um hagnýtingu hugverka starfsmanna Háskóla Íslands.

Fagleg umfjöllun um umsóknir fyrir Rannsóknarnámssjóð.

Umsögn um tillögu viðskipta- og hagfræðideildar um skólagjöld í meistaranámi.

Umsögn um ráðningu lektora með 20% starfshlutfall.

Umsögn um tillögur að stigamati fyrir kennslu.

Gæðakerfi Háskóla Íslands - Umsögn um tillögur að úttektum á deildum og stofnunum.